

Tabrat n Bulus i Filimun

¹Bulus, amehbus n Lmasih Yeccu d tawmat Timutiya, i Filimun ieizzen d uxeddam akidney, ²d učmatney Abfiya ieizzen, d umjahed nney Arxibbus d tmesmunt di taddart nnek: ³nniemet d řehna akidwem iřin zi Arebbi, Babatney u zi Yeccu Lmasih Siditney.

⁴Necc ttqadiy Arebbi inu, am daywem ttfekkaray řebda di tzađit inu, ⁵minzi necc ttesřiy x tayri d liman nwem i daywem iđan i Sidi Yeccu uřa i marra imqeddasen, ⁶řima amuni nwem di liman ad tegma nican di tmusna n marra řxar i dayney iđan di Lmasih Yeccu. ⁷Neccin aqqa řarney řefrařet d ufewwej ařas zi ssibbet n tayri nwem, minzi cek, a tawmat, aqqa tessareyyřed uř n imqeddasen.

⁸S uyenni, waxxa necc řari taryast ařas di Lmasih řima ad cek umurey min icuwwaren, ⁹maca aqqa necc di ssibbet n tayri, řari řsen ad zzayek ttarey. Umi necc ammu i řiy, aqqa-yi d awessar uca řexxu řawed d amehbus n Lmasih Yeccu, ¹⁰necc ttariy ac-d x mmi Unisimus, wenni d jjiy di snaseř *da di řehbes*, ¹¹wenni tuya war cek ineffeen zic, maca řexxu aqqa ineffee i cek u ineffee ayi. ¹²Necc aqqa arriy ac t-id d uř inu. ¹³Necc mři ufiy iři aqqa jjiy t danita akidi mařend ad xafi isexxar deg wemcan nnek min da řa kkey di snaseř x ssibbet n řexbar ařebřan. ¹⁴Maca necc war xsey ca ad ggey walu nnebřa ttesriř nnek, řima tcuni i teggid ad tiři s řxařar, war iđi s uyiř. ¹⁵Minzi attay tuya imsebđa xak i drus n řweqt řima ad řarek yiři řawed i řebda, ¹⁶war iđi ead amecnaw ismey, maca amecnaw ijjen i iđan ktar zeg ismey, am tawmat ieizzen, i necc beęda, mahu i cek, deg weysum uřa di Arebbi. ¹⁷Mařa řřesbed ayi d amęacar nnek, qebř it amecnaw necc. ¹⁸Mařa netta tuya iđđarri cek niy zeęma dayes amarwas, egg it xafi! ¹⁹Necc, Bulus, uriy s ufus inu, aqqa ad t xegřey, mařend war qqarey ca, aqqa uřa d cek tettursed ayi ixef nnek. ²⁰Wah, a tawmat ieizzen, ejj ayi ad zzayek arebřey di řřwee n Sidi, sareyyeř uř inu. ²¹Necc ttariy ac-d, am ttiqqey mařend ad teřęeed uca necc ssney aqqa cek ad tegged mahu min d ac i řa iniy.

²²Sewjed ayi amcan mani i řa zedyey, minzi ssitimey ad řarwem-d dewřey s tzađit nwem. ²³Ibafra wenni akidi da di řehbes di Lmasih Yeccu, aqqa iseřem xak, ²⁴uřa d Marku d Aristarxus d Dimas d Luka inni ixeddmen akidi. ²⁵Nniemet n Siditney Yeccu Lmasih ad kiwem tiři!